

C. SVLPICI APOLLINARIS PERIOCHA

In militiam proficisci gnatum Cliniam
amantem Antiphilam conpulit durus pater
animique sese angebat facti paenitens.
mox ut reversust, clam patrem devortitur
5 ad Clitiphonem. is amabat scortum Bacchidem.
cum accerseret cupitam Antiphilam Clinia,
ut eius Bacchis venit amica ac servolae
habitum gerens Antiphila: factum id quo patrem
suum celaret Clitipho. hic technis Syri
10 decem minas meretriculae aufert a sene.
Antiphila Clitiphonis reperitur soror:
hanc Clinia, aliam Clitipho uxorem accipit.

PERSONAE

(PROLOGVS)	BACCHIS MERETRIX
CHREMES SENEX	ANTIPHILA VIRGO
MENEDEMVS SENEX	SOSTRATA MATRONA
CLITIPHO ADVLESCENS	(CANTHARA) NVTRIX
CLINIA ADVLESCENS	PHRYGIA ANCILLA
SYRVS SERVOS	(CANTOR)
DROMO SERVOS	
